



UNIVERSITY OF THE FREE STATE
UNIVERSITEIT VAN DIE VRYSTAAT
YUNIVESITHI YA FREISTATA

Office of the Rector and Vice-Chancellor

La 27 Motsheanong 2019

Puisano e tswang ho Rector le Motlatsi wa Chancellor ho Mokgatlo wa Yunivesithi

Moifo le baithuti ba ratehang,

Ke ngola tjena jwalo ka Rector le Motlatsi wa Chancellor ho bolela ka moo ke swabileng ka teng le ho hlahisa ngongoreho ya ka e tswang botebong ba pelo ka diketsahalo tse etsahetseng nakong ya boipelaetso ba moraorao ba baithuti dikhemphaseng tsa rona (ka 4 Mmesa 2019 mane khemphaseng ya Qwaqwa le ka la 21 Motsheanong 2019 khemphaseng ya Bloemfontein). Ke ile ka tshwenngwa haholo ke ka moo diketsahalo tsena tsa dintwa, tshenyo ya thepa le ditshosetso tse ileng tsa bontsha ho hatikelwa ka maoto ha polokeho, seriti le ditokelo tsa moifo le baithuti, le mehaho ya yunivesithi.

Ke lakatsa ho fana ka tiisetso le ho fetisa maikutlo a ka a ho ema hammoho le moifo, baithuti le baeti bakeng sa mohato o tiileng oo ba ileng ba o nka kgahlanong le boitshwaro bona, mme ke maswabi haholo hore le ile la tshwanela ho bona boitshwaro bo tjena.

Jwalo ka ha le lemoha, re ile ra sebetsa ka thata ho eketsa seabo sa Institutional Student Representative Council (I-SRC), hammoho le SRC ya khemphase, ho arabela dipotsong tsa baithuti, le dipotsong tsa bona mabapi le mathata a NSFAS, ho hlophisa mehato ya ditumellano mabapi le tshehetso ya baithuti ka ditjhelete, le ho matlafatsa lentswe la baithuti bolaoding ba univesithi. Re tla tswela pele ho etsa jwalo.

Ka tshebediso ya Moralo wa rona wa Phetoho ya Kopanelo (Integrated Transformation Plan (ITP)), re boetse re sebetsa ka thata ho fihlella tjhebelopele le morero wa yunivesithi ya rona le ho theha boahi bo botjha ba yunivesithi bo kgothaletsang ka matla tsotello ya boitshwaro, le ho eketsa maqhama a indasteri, lefapha la praevete, kgwebo le bafani ba ditjhelete, e le hore re ka tsetela tjhelete e eketsehileng ho dibasari tsa baithuti, katlehong ya baithuti, le mehahong ya yunivesithi le diphuputsong. Pefo le dintwa tse etsahetseng nakong ya boipelaetso di na le kgahlamelo e mpe lebitsong le letle la yunivesithi, empa ha bohlokwa ka ho fetisisa, di senya seo re batlang ho se fihlella jwalo ka yunivesithi – moetapele eo ho nahanwang ka yena ya nang le tshusumetso provinsing ya rona, naheng ya rona, le khontinenteng ya rona le lefatsheng la rona.

Tshosetso, tshitiso e qobellwang ya dithuto le ditlhahlobo, mantswe a hlabang a nang le kgethollo ya merabe, tlaselo, le tshenyo ya thepa tse etsahetseng nakong ha boipelaetso bona ho hang di tshwelwa ka mathe mme ha di amohelehe.

Jwalo ka Rector le Motlatsi wa Chancellor, ke boikarabelo ba ka, hammoho le boetapele ba yunivesithi, ho fedisa ka ho feletseng kgethollo e jwalo, bomorabe, tshenyo ya thepa, tshosetso le ntwā, dibakeng tsohle. Ho phethahatsa boikarabelo bona, re lakatsa ho nnetefaletsa mokgatlo wa Yunivesithi hore:

- [a] mehato ya diphuputso le ya kgalemelo e nkuweng ka lebaka la diketso tsena tsa boipelaetso e tla phethwa ka potlako e kgolo ho latela Mekgwatshebetso ya Kgalemelo ya Yunivesithi, mme mokgatlo wa yunivesithi o tla nne o fuwe tlhahisoleseding ya moraora mabapi le kgatelopelo ya diphetho tsa diphuputso tsena le kgalemelo;
- [b] re tla lekola hape Mekgwatshebetso ya Kgalemelo ya yunivesithi e le hore batho ba ba kentse letsoho diketsong tsena tsa ntwā tsa boipelaetso ba ka ba fumantshwa kahlo kapelepele;
- [c] prothokhole e tla etsuwa e tla tataisa moifo le baithuti hore na ba tlameha ho etsang haeba ditshitiso tse tjena di etsahala;
- [d] sistimi ya puisano ka 'nako' le moifo wa rona e tla kenngwa tshebetsong haeba ditshitiso tsa mofuta ona di etsahala; le
- [e] tshebedisanong le Senate, Student Affairs le ISRC, re tla tswela pele ho kenyeletsa baithuti dipuisanong e le ho eketsa temoho ya bona mabapi le hore na ho bolelang ho etsa boipelaetso bo nang le kgotso le hore na ba tshwanetse ho itshwara hantle jwang.

Le hoja ke utlwisisa maikutlo a tebileng a tshwenyehileng a moifo le baithuti, ke lakatsa ho etsa boipelaetso ho mokgatlo wa yunivesithi hore ba be le mamello le boitshwaro ha diketsahalo tsena di ntse di sebetswa. Boetapele ba Yunivesithi bo itlamme ho ba le dipuisano tse nang le tlhompho le seriti le ditho tsohle tsa mokgatlo wa yunivesithi ho theha tikoloho e bolokehileng, e nang le kgotso le e tshwanelehang bakeng sa mesebetsi ya thuto kapa akhademiki.

Ba lona ka botshepehi



Moprosesara Francis Petersen
Rector le Vice-Chancellor
Yunivesithi ya Freistata